

Carta n-tunda'a Spalu nuu ñayiu Éfeso

*Ndajan tnu'u Spalu ñayiu ka kukanu ini Jesu-
cristu xndaxio Éfeso*

¹ Daña Spalu, se n-tunda'a ña'a Cristu Jesús xa dakua'a-da ñayiu, tunda'a-da carta ya'a juan xee nuu ndixi xa n-kida Ianyuux xa n-ka nduu-n ñayiu ii, te xndaxio-n Éfeso, te ka kukanu ini-n Cristu Jesús. N-tunda'a ña'a-ia chi daa n-ñu ini Ianyuux xa koo. ² Xijan ta'u-da nuu Taa-ro Ianyuux xi'in nuu Jesucristu xa na chindee chituu ña'a-ia. Xijan ta'u-da nuu-ia xa na kada-ia xa na ku kundaa ku kuvatu anu koio-n chi n-ka natu ini-n xa n-ka kida-n kuechi.

*Kue'e xava'a kida Ianyuux ñayiu ka kukanu ini
Jesucristu*

³ Na ndadaka'nu-ro Taa-ro Ianyuux, Ia kuu Taa Jesucristu. Diuni kuu-ia Ianyuux-ia. Xto'o-ro kuu Jesucristu. Kue'e xava'a kida ña'a Ianyuux. Kida-ia xa xee-ro ku kuu-ro ñayiu va'a ka, te kutuu-ro xi'in-ia andiu. Xaxe'e xa kunduu-ro xi'in Cristu, daa kida ña'a-ia. ⁴ N-kaxi ña'a-ia xa ku kuu-ro da'ya-ia, te n-kida-ia xa n-nduu-ro ñayiu ii. Naka va'a-ia. Diuni n-kida-ia xa n-nduu-ro ñayiu ñatuka xndido xtau kuechi-i. Na ta nkavatu ka ñuñayiu, n-kaxi ña'a-ia. Xaxe'e xa xemani ña'a-ia n-kaxi ña'a-ia. ⁵ Xa daa nga n-xo ñu ini-ia xa nduda'ya ña'a-ia, te n-nduda'ya ña'a-ia. Daa n-ñu ini-ia xa kada-ia chi daa n-juini-ia, te tna ini-ia

xijan. Diuni xa daa nga n-xo ñu ini-ia xa kada Jesucristu ñin xa kada-ia na kua'a nduu koio-ro da'ya-ia. Xijan kuu xa n-nduda'ya ña'a-ia. ⁶ Xaxe'e xa n-kida Cristu, Ia mani juini-ia, xa n-kida-ia, ntdaa xijan n-kida Ianyuux. Na ja'an koio-ro, “Naka kue'e xava'a n-kida ña'a-ia. Naka va'a-ia.” Xijan n-kida ña'a-ia xa na ndadaka'nu-ro-ia. ⁷ N-xatu niñi Cristu xa n-chiya'u-ia kuechi-ro, te n-taxkanu ini Ianyuux kuechi n-ka-kida-ro. Ña tuu nax jeya'u-ia xa daa n-kida-ia. Naka kue'e xava'a n-kida ña'a-ia. ⁸ Xaxe'e xa yo va'a-ia, n-kida-ia xa ku kuu-ro ñayiu kaxi ini, te va'a xini-ro nax kuu xa n-kida-ia. ⁹ Vitna n-kida-ia xa n-xini-ro xa n-xo ñu ini-ia xa ya'a. Ya'a ñin xa ñayo uun n-xo xini, chi mee ni-ia n-xo na'a xijan. Vitna dada n-datu-ia xijan nuu-ro. Xa daa nga n-ñu ini-ia xa kada-ia xa'a chi daa n-juini-ia xa ya'a. ¹⁰ N-ñu ini-ia xa nkonetniu Cristu. Kiu n-ñu ini-ia xa nkonetniu-ia, kiu ijan n-xe konetniu-ia. N-ñu ini-ia xa taxnuni Cristu nuu ntdaa ñayiu xi'in nuu ntdaa ángel xi'in nuu xaloko. ¹¹ Xaxe'e xa kunduu-ro xi'in Cristu ku kuu-ro ta'u Ianyuux. Xa daa nga n-kaxi ña'a Ianyuux xa ku kuu-ro ta'u-ia. Xa daa nga n-ñu ini-ia xa du'a ya'a. Mee-ia kida xa ya'a ntdaa xa n-xio xa ya'a; koo ntdaa xa ñu ini-ia xa koo. ¹² Ki'na ka dañá n-ka kukanu ini Cristu, ijan dada n-ka kukanu ini ndixi-ia. Ntdaa-ro, nani dañá, dani ndixi, xñu ini xa ndixi-ia, te ku kuu-ro ta'u Ianyuux. N-ñu ini-ia xa ku kuu-ro ta'u-ia, te ndadaka'nu-ro-ia. ¹³ N-kida Cristu xa n-ka tekun nax io xa kada koio-n xa nanita'u-n. ñin xandaa kuu xijan. N-keé Espiritu Ianyuux anu-n xaxe'e xa n-ka kukanu ini-n Cristu. N-taxi

Ianyuux tnu'u-ia xa taxi-ia Espíritu-ia. Kuenda kiu ñin sellu kuu Espíritu-ia, te kuenda kiu ñin nuu nde-nee sellu jan ka kuu-n. ¹⁴ Xa na kuna'a-ro xa ni'i-ro ta'u-ro n-taxi Ianyuux Espíritu-ia. N-chiya'u Cristu kuechi-ro xa na kua'a kaku-ro. Xa na ndadaka'nu koio-ro-ia daa n-kida-ia.

Xijan ta'u Spalu nuu Ianyuux xa na juña'a-ia xa xaxtnuni ñayiu ka kukanu ini Jesucristu

¹⁵⁻¹⁶ N-teku-da xa ka kukanu ini na'i-n Jesús, Ia kuu Xto'o-ro. Diuni n-teku-da xa yo ka xemani-n dava ka ñayiu n-kida Ianyuux xa n-ka nduu-i ñayiu ii. Xijan kuu xa hora xijan ta'u-da nuu Ianyuux, naja'an ña'a-da, te kiu xi'in kiu xia'an-da nuu-ia xa n-kuta'u-da xaxe'e xa n-ka kukanu ini-n Cristu. ¹⁷ Xijan ta'u-da nuu Taa-ro Ianyuux, Ia tuu andiu, Ia kuu Taa Xto'o-ro Jesucristu, xa na taxi-ia xa xaxtnuni xa na kutnuni ini koio-n jundu kuu Ianyuux. Diuni xijan ta'u-da nuu-ia xa na kada-ia xa na jini-n nax kuu xa n-ja'an-ia na kua'a na jini ndaa jini kuiti-n jundu kuu-ia. ¹⁸ Xijan ta'u-da nuu-ia xa na jini-n nakuenda n-kida-ia xa n-ka teku koio-n tnu'u-ia. Xa na kua'a na jun ini-n xa ndixi-ia, n-kida-ia xa n-ka teku koio-n tnu'u-ia. Diuni xijan ta'u-da nuu-ia xa maxku ndunaa-n xa ku kuu-ro ta'u-ia. Ndandi'i-ro nuu-ia xa ka kuu-ro ñayiu n-kida-ia xa n-ka nduu-ro ñayiu ii, te ku kuu-ro ñayiu yo ndandi'i. ¹⁹ Diuni xijan ta'u-da nuu-ia xa maxku ndunaa-n xa yo kidatniu-ia anu roo, ñayiu ka kukanu ini-ia xa na kua'a na ku kuu-ro ñayiu va'a. Naka kue'e xa kida-ia. Naka kidatniu-ia anu-ro. ²⁰ N-kida-ia xa n-nandoto Cristu te n-xantuu-ia-ia diñi kua'a-ia andiu xa

taxnuni-ia ²¹ nuu ntdanditu'u ñayiu xi'in nuu ntdanditu'u se ka taxnuni ñuñayiu, nuu xaloko xi'in nuu ángel-yi, nuu ángel xtuu andiu du. Ñayo xee ña'a. Taxnuni-ia vitna, te dani taxnuni-ia ñikava ñikuita. ²² Junukuechi ntdaa ñayiu, ntdaa ángel, ntdaa xaloko du nuu-ia. Dani roo, ñayiu ka kukanu ini-ia, n-kida Ianyuux xa taxnuni-ia nuu ntdanditu'u roo. Kuenda kiu diki ntdanditu'u-ro kuu-ia. ²³ Kuenda kiu yiki kuñu-ia ka kuu-ro. N-keé-ia anu-ro te ñu'u ña'a-ia ntdaa-ro, te ka kuu-ro ná kuu-ia.

2

Xaxe'e xa n-kunda'u ini ña'a Ianyuux dananita'u ña'a-ia

¹ N-ka xo kida-n kue'e kuechi na ta jandixa ka-n Ianyuux. Kuenda kiu ndiyi n-ka xo kuu-n chi ñatu n-ka kutnuni ini-n jundu kuu-ia. ² Daa n-ka xo kida-n xaloko xadu'a ná ka kida ñayiu ñatu ka jandixa Ianyuux. N-ka xo kida-n xa n-xo ta'u tniu Kui'na. Taxnuni Kui'na nuu dava ka xaloko, te kidatniu-i anu ñayiu ka kuxe ini nuu Ianyuux. ³ Ntdaa-ro n-ka kida ná ka kida ñayiu ka kuxe ini jan. Nandikaa nanditu'u kuechi n-ka xo kida-ro xa n-ka xo kida-ro xa juuni mee-ro. N-ka xo kida-ro ntdanditu'u kuechi n-ka kuu ini-ro xa kada-ro chi daa vaa-ro ñuñayiu. N-ka kida-ro dava'a nga xaloko n-kixdiki-ro xa kada-ro. Daa n-xo kiti ini Ianyuux nuu-ro ná kiti ini-ia nuu dava ka ñayiu ka kuxe ini nuu-ia, te kada u'u ña'a-ia n-kuu. ⁴⁻⁵ Kuenda kiu ndiyi n-ka kuu-ro xaxe'e xa ñatu n-kua'a-ro xa kada-ro xava'a; te n-ka xo kida-ro kuechi. Kuenda kiu ndiyi n-ka

kuu-ro, ko n-nadandoto ña'a-ia na n-nadandoto-ia Cristu. Xaxe'e xa n-kunda'u ini ña'a Ianyuux roo xi'in xaxe'e xa mani juini ña'a-ia, daa n-kida ña'a-ia. N-dananita'u ña'a-ia xaxe'e xa va'a-ia. Naka va'a-ia. ⁶ Xaxe'e xa kunduu-ro xi'in Cristu Jesús, kuenda kiu n-nadandoto ña'a Ianyuux roo na n-nadandoto-ia-ia, te jantuu ña'a-ia xi'in-ia andiu. ⁷ Xa na jini ñayiu ta koo ka xa yo va'a-ia, du'a n-kida-ia. Va'a xa va'a n-kida ña'a-ia. Xaxe'e xa kunduu-ro xi'in Cristu Jesús, n-kida ña'a-ia xa'a. Yo vichi va'a-ia. ⁸ N-dananita'u ña'a Ianyuux, ko xaxe'e xa va'a-ia xi'in xaxe'e xa n-kunda'u ini ña'a-ia xi'in xaxe'e xa kukanu ini-ro Jesucristu; ñadu xaxe'e xa ka kida-ro xava'a. Ña tuu nax n-jenya'u-ia. Nakuta'u-ro xa daa n-kida ña'a-ia. ⁹ Ñadu xa xaxe'e xa n-ka jandixa-ro-ia, nanita'u-ro chi nuu n-xio xa xaxe'e xijan nanita'u-ro n-kuu, naka ku kuu i'ni-ro. ¹⁰ Xaxe'e xa kunduu-ro xi'in Cristu Jesús kidatniu Ianyuux anu-ro xa nduu-ro ñayiu va'a xa na kua'a kada-ro xava'a. Xa daa nga n-ñu ini Ianyuux xa na nduu-ro ñayiu va'a te kada-ro xava'a ndikiu ndiñuu.

N-kida Jesucristu xa n-ka kumani ñayiu ñatu ka kuu ñayiu Israel xi'in ñayiu Israel

¹¹ Ndixi, xaxe'e xa ñatu ka ta'nde ndodo ñi nuu ii-n, ka dandee ña'a se Israel se ña ta'nde ndodo ñi nuu ii. Maxku ndunaa koio-n janda n-ka xo kuu-n. ¹² Ñatu n-ka xo xini-n jundu kuu Cristu. Na ja'an-da in tnu'u. Kuenda kiu ñatu n-yitna'a-n nuu ñayiu Israel, ko vitna yitna'a-n nuu-i. Ñayiu juera n-ka xo kuu-n. Ña n-ka xo xini-n nuu nax n-ja'an Ianyuux xa juña'a-ia ñayiu Israel. Ñatu n-ka xani ini-n xa nanita'u-n. Ni ñatu n-xo ndeka ña'a

Ianyuux, ¹³ ko vitna ndeka ña'a-ia xaxe'e xa n-xi'í Cristu xaxe'e kuechi-n, te kunduu-n xi'in-ia nuu ka xikonuu ka xikondodo-n.

¹⁴ N-xio ñin xa n-xo kida xa n-ka xo xini u'u tna'a-n xi'in ñayiu Israel. Kuenda kiu ñin nama dujun nukoo me'ñu uu ñuu n-xo kuu xijan, te n-xanu Jesucristu xijan na n-xi'í-ia. Te n-kida-ia xa n-ka kumani-n xi'in ñayiu Israel, kuenda kiu ñin nga ñuu teyu-n xi'in-i vitna. ¹⁵ Ley n-xo taxnuni nuu ñayiu Israel kuu nama dujun jan. N-kida-ia xa ñatuka taxnuni ley ñayiu Israel nuu-i. Xa na nduu-n ntdaa-n xi'in ñayiu Israel ñin nga ñayiu n-kida-ia xijan. Kuenda kiu ñin ni ñuu ñin ni teyu-n ntdaa-n vitna, te n-ka kumani-i xi'in-n. ¹⁶ N-xi'í-ia nuu curuxi xa na kua'a na nduu koio-n ñin nga ñayiu te kumani Ianyuux xi'in-n ntdaa-n. Diuni na n-xi'í-ia n-kida-ia xa ma jini u'u tna'a ka-n xi'in ñayiu Israel. ¹⁷ Na n-kixi Cristu ñuñayiu, n-ja'an-ia nax io xa kada-ro xa kumani koio-ro xi'in Ianyuux. Xa n-ja'an-ia nuu ndixi xa ñatu n-xo ndeka ña'a-ia, xijan n-ja'an-ia nuu ñayiu xa daa nga ndeka-ia. ¹⁸ Ka kuu-ro ñayiu Israel a ka kuu-ro ñayiu ñatu kuu ñayiu Israel, ko chinuu Taa-ro Ianyuux tnu'u ja'an-ro nuu-ia xaxe'e xa ñu'u ña'a Espíritu-ia. Xa na kua'a ju'un ña'a Espíritu Ianyuux ntdaa-ro, n-xi'í Cristu. ¹⁹ Ñatuka ka ja'an ñayiu Israel jan xa ka kuu-n ñayiu juera chi kuenda kiu ñin ni ñuu ñin ni teyu-n xi'in-i vitna. N-kiu tna'a-n nuu ñayiu n-kida Ianyuux xa n-ka nduu-i ñayiu ii vitna. Ka kuu-n da'ya Ianyuux vitna na ka kuu ñayiu Israel da'ya-ia. ²⁰ Kuenda kiu yuú xe kava tna'a nama ve'e kua'a jua'an ka kuu-ro ntdaa-ro. Kuenda kiu cimientu nama jan ka kuu uxi uu se n-tunda'a ña'a Jesús xa dakua'a-s

ñayiu xi'in se n-ka xo ja'an nuu ñayiu xa n-ja'an Ianyuux nuu-s. Yuú ñukax ini ka yitnñi nama ve'e jan kuu Cristu Jesús. ²¹ Xa vax kukue'e ka ñayiu ka kukanu ini Jesucristu jua'an kuu xa xe kava tna'a ka yuú kua'a nama ve'e jan jua'an. Na xinokava ve'e jan, te ku kuu veñu'u ii. Kuenda kiu veñu'u ii jan ku kuu-ro chi ka kunduu-ro xi'in Cristu, Ia kuu Xto'o-ro. ²² N-kida Ianyuux xa n-ka kiu tna'a-n nuu-da ntdaa-da te kukue'e ka-ro jua'an. Kuenda kiu ñn ve'e tuu Ianyuux ku kuu-ro ntdaa-ro chi ñu'u ña'a Espíritu-ia ntdaa-ro.

3

N-tetutniu Ianyuux Spalu xa juña tnu'u-s ñayiu ñatu ka kuu ñayiu Israel xa n-kida Cristu

¹ Xaxe'e ntdaa xa'a xi'in xaxe'e ntdaa ndixi, ñayiu ñatu ka kuu ñayiu Israel, yindi'u dañá vekaa. ² Kuiti xna'a-n xa n-tetutniu ña'a Ianyuux xa kachitnu'u ña'a-da nax io xa kada-n xa na dananita'u ña'a-ia. Va'a-ia xa du'a n-tetutniu ña'a-ia. ³ N-kachitnu'u ña'a Ianyuux nax kada-ia xa na kua'a nanita'u koio-n. Mee ni-ia xa daa nga n-xo na'a xijan. Xá n-chidotnuni-da xaku xa kakune'e-da ya juan xee nuu-n. ⁴ Na ya'a xa ka'u koio-n tutu ya'a, jini koio-n nax kuu xa n-kida Cristu. Xijan kuu xa n-kachitnu'u ña'a Ianyuux dañá. ⁵ Ñatu n-datuu Ianyuux xijan nuu ñayiu antes, ko vitna n-datuu Espíritu-ia nuu se n-tunda'a ña'a Jesús xa dakua'a koio-s ñayiu xi'in nuu se ka ja'an nuu ñayiu xa n-ja'an Espíritu Ianyuux nuu-s. N-kida Ianyuux xa n-ka nduu-s se ii. ⁶ N-kachitnu'u ña'a-ia xa teku ñayiu ñatu kuu ñayiu Israel vitna nax io xa kada-i xa nanita'u-i

na kua'a ni'i-i ta'u-i andũu tuku. Nani ni'i ñayiu Israel ta'u-i, dani ni'i ñayiu ñatu kuu ñayiu Israel ta'u-i. Ni'i koio-i xa n-ja'an Ianyuux xa juña'a-ia xaxe'e xa ka kunduu-i xi'in Cristu Jesús. Kuenda kũu idii nga ñayiu ka kuu-i ntdaa-i. ⁷ N-tetutniu ña'a Ianyuux xa juña tnu'u-da ñayiu xijan. Mudu ya'a xinokuechi-da nuu-ia. Kidatniu-ia anu-da xa na ndaku-da xa kada-da tniu-ia. Na kuta'u-da xa n-tetutniu ña'a-ia. Naka va'a-ia. ⁸ Daña, se ndijun nga ndandi'i nuu ñayiu ii kuu-da, ko n-tetutniu ña'a-ia xa juña tnu'u-da ñayiu ñatu ka kuu ñayiu Israel nax n-kida Cristu xa na nanita'u-i. Va'a xa va'a kida ña'a-ia. Yo vichi va'a-ia. ⁹ N-xantuu Ianyuux, la n-kidava'a ñayiu, ángel, ntdaa xa io du xa juña tnu'u koio-da ñayiu nax kuu xa n-ñu ini-ia xa kada-ia na kua'a nanita'u-i. Mee ni Ianyuux xa daa nga n-xo na'a xijan. ¹⁰ Xa na jini koio xaloko xi'in ángel ndeka-i xa yo va'a tu'a Ianyuux, kida-ia ñayiu kukanu ini Jesucristu xijan vaxi. Diuni jini koio-i xa yo ndichi tnu'u-ia. ¹¹ Nde na ta nka-vatuu ka ñuñayiu xa daa nga n-ñu ini Ianyuux xa daa kada ña'a-ia chi n-xo na'a-ia xa kuú Cristu Jesús, ia kuu Xto'o-ro. ¹² Xaxe'e xa kunduu-ro xi'in Cristu Jesús, kuyii-ro xa xijan ta'u-ro nuu Ianyuux, te tuu-ro xa nini-ia ntdaa xa ja'an-ro nuu-ia. ¹³ Xaxe'e xijan, xijan ta'u-da nuu Ianyuux xa maxku ku tnau ini koio-n xa nda'u ya'a-da. Koo ka'nu anu koio-n. Xaxe'e xa dakua'a ña'a-da ntdaa-n, du'a ya'a-da. Kuu mee-n xava'a xa du'a ya'a-da chi nduka'nu koio-n andũu.

Yo vichi xemani Cristu ñayiu ka kukanu ini-ia

¹⁴ Xaxe'e xijan xko xijan ta'u-da nuu Taa-ro Ianyuux. Xjuiin xiti-da hora xijan ta'u-da. ¹⁵ Taa

ntdaa ñayiu kuu Ianyuux xaxe'e xa n-kidava'a-ia-i. Diuni kuu-ia Taa ntdaa ángel, ia io andiu, chi n-kidava'a-ia-ia tuku. ¹⁶ Xijan ta'u-da nuu-ia xa na kadatniu Espíritu-ia anu-n na kua'a na kukanu ini ka-n-ia. Naka kue'e xa kua'a Ianyuux xa kada-ia. Naka vichi kidatniu-ia anu-ro. ¹⁷ Diuni xijan ta'u-da nuu-ia xa na kada-ia xa kunduu-n xi'in Cristu chi ka kukanu ini-n-ia. Na kada Cristu xa juemani koio-n-ia xi'in ñayiu. ¹⁸ Xijan ta'u-da nuu Ianyuux xa na chindee ña'a-ia xa na jini-n ntdaa-n xi'in ntdaa ñayiu n-kida Ianyuux xa n-ka nduu-i ñayiu ii xa yo vichi xemani ña'a Cristu. Naka xemani ña'a-ia. Naka mani ini-ia. ¹⁹ Yo vichi xemani ña'a-ia. Xijan ta'u-da nuu Ianyuux xa na nduu ntdanditu'u-n ñayiu va'a na va'a-ia.

²⁰ Kidatniu-ia anu-ro, te kue'e xava'a kida ña'a-ia. Nde xa ña kixdiki-ro xa ja'an-ro nuu-ia xa kada ña'a-ia, kada ña'a-ia. Nde xa ña kixdiki-ro xa kada ña'a-ia, kada ña'a-ia. ²¹ Na ndadaka'nu roo, ñayiu ka kukanu ini Cristu Jesús, Ianyuux nikava nikuita, chi ka kunduu-ro xi'in-ia. Dani na ndadaka'nu ña'a dava ka ñayiu xndaxio vitna xi'in ñayiu ta koo ka. Amén.

4

Idii nga ñayiu n-ka nduu ntdaa ñayiu ka kukanu ini Jesucristu

¹ Xaxe'e xijan, ja'an dañá, se yíndi'u xaxe'e Ia kuu Xto'o-ro, nax io xa kada koio-n. Maxku kada koio-n in xa ñatu natau chi ñayiu n-kida Ianyuux xa tekuro tnu'u-ia ka kuu-ro. ² Maxku ku kuu koio-n ñayiu xe ini. Vivii ja'an koio-n nuu ñayiu. Maxku yachi kiti ini koio-n. Juemani tna'a-n na

kua'a taxkanu ini nuu tna'a-n. ³ Jun ini koio-n xa ma jantna'a tnu'u-n na kua'a maxku dandoo tna'a-n. Xaxe'e xa ñu'u ña'a Espíritu Ianyuux ndixi xi'in xaxe'e xa mani xtuu-n, ndaku koio-n xa ma jantna'a tnu'u-n. ⁴ Idii nga ñayiu ka kuu-ro nt-daa-ro chi kuenda kiu yiki kuñu Cristu ka kuu-ro. Idii ni Espíritu Ianyuux io, te ñu'u ña'a-ia nt-daa-ro. ñin ni Ia xndetu-ro nt-daa-ro chi n-kida Ianyuux xa tekuro tnu'u-ia xa na kua'a na kuvete-ro xa ndixi Ia xndetu-ro. ⁵ Idii ni Ia kuu Xto'o-ro Jesús io. ñin ni xa ka jandixa-ro. ñin ni-ia ka kukanu ini-ro. Xaxe'e xa ka kukanu ini-ro-ia, ka xendute-ro. ⁶ Idii ni Ianyuux io, te kuu-ia Taa-ro nt-daa-ro. Kunduu-ro xi'in-ia. Kidatniu-ia anu-ro nt-daa-ro xa na kada-ro xa juini-ia. Kuu-ia Ia taxnuni nuu-ro nt-daa-ro.

⁷ N-kida Cristu xa tuku tniu ka kida dava-ro, te tuku tniu kada dava ka-ro. Io ñayiu va'a ka ka kida tniu-ia, io ñayiu ña'a nga. Kidatniu-ia anu-ro ñin ñin-ro xa ña kada-ro tniu-ia. Naka va'a-ia. ⁸ Du'a yodotnuni:

Kiu juan ndaa-s andiu, ndeka-s se n-tni-s juan ndaa.

Kue'e xa n-xia'an nga-s ñayiu.

⁹ N-xio xa ndaa-ia andiu xaxe'e xa n-juun-ia nuu kunu xa kunu ñuñayiu. ¹⁰ Ia n-juun nuu kunu ñuñayiu kuu Ia juan ndaa nde yata andiu xa na kua'a kada-ia xa ku kuu-ro ná kuu mee-ia xi'in xa na ju'un-ia ñayiu, ángel, nt-daa xa io andiu xi'in ñuñayiu du. ¹¹ Mee-ia n-kida xa ma ñin ni tniu kada-ro nt-daa-ro chi tuku tniu n-taxi-ia xa kada dava-ro, te tuku tniu n-xia'an-ia xa kada dava ka ñayiu. Dava-i ka ja'an nuu ñayiu nax io xa kada-i xa na kua'a na nanita'u-i. Dava-i n-tunda'a-ia xa dakua'a-i ñayiu ta tekuro ka tnu'u-ia. Dava-i ka ja'an

nuu ñayiu xa n-ja'an Ianyuux nuu-i. Dava-i xñunuu ñayiu ka kukanu ini Cristu, te ka dakua'a-i-yi. ¹² Ka kida-i xa na kutnuni va'a ka ini koio ñayiu kuu kuenda kiu yiki kuñu Jesús xa n-ja'an Ianyuux. N-kida Ianyuux xa n-ka nduu-i ñayiu ii. ¹³ Juini Ianyuux xa inuu na kukanu ini-ro Cristu xi'in xa na jini koio-ro jundu kuu-ia xi'in nax n-kida-ia na kua'a na xee-ro ku kuu-ro in ñayiu n-tnuu ini, te ku kuu-ro ñayiu va'a na va'a mee-ia. ¹⁴ Maxku ku kuu ka-ro ná kakuu sekuechi xa ka jandixa-s dava'a nga xa ka ja'an ñayiu. Kuenda kiu in barcu du'a du'a ndeka ña'a tachi nde'e jua'an ka kuu-s. Ka jandixa-s ñayiu n-kua'a xa daja'an-i inka ñayiu xa na jandixa-i in xa ñatu kuu xandaa. Va'a n-kua'a ñayiu ijan xa danda'u-i inka ñayiu. ¹⁵ Xaxe'e xa mani ka juini tna'a-ro, io xa juña tnu'u tna'a-ro ntdaa xa n-ja'an Ianyuux xa na xee-ro ku kuu-ro ná kuu Cristu. In xandaa kuu xa n-ja'an-ia. Kuenda kiu diki roo, ñayiu ka kukanu ini Cristu kuu-ia. ¹⁶ N-kida-ia xa in ni ñayiu n-ka nduu-ro, te kuenda kiu in in parti yiki kuñu-ia ka kuu-ro. Xa'nu in in parti yiki kuñu-ro según janda xnetna'a-i. Xaxe'e xa mani ka juini tna'a-ro, kida-ro ntdaa-ro tniu n-taxi Ianyuux xa na kua'a kutnuni va'a ka ini dava ka ñayiu tnu'u-ia yodotnuni xi'in xa na kukanu ini va'a ka-i Cristu xi'in xa na kukue'e ka ñayiu kukanu ini-ia. Diuni kuenda kiu in ve'e kua'a jua'an ka kuu-ro.

Janda io xa kutuu kunukoo ñayiu ka kukanu ini Cristu

¹⁷ Xaxe'e xijan kachitnu'u ña'a-da xa maxku kutuu kunukoo ka-n ná xtuu ñayiu ñatu ka xini

jundu kuu lanyuux. Ka xani ini-i xa ñn xa ñukax ini ka ke'e-i, ko ñadu ñn xa ñukax ini kuu xa ka kida-i. Ta'u tniu Cristu xa ja'an-da xa'a nuu-n. ¹⁸ Xaxe'e xa ñayo-i ka xini xa tnu'u lanyuux kuu ñn xandaa, ñayo-i xtuu ná ta'u tniu-ia. Hora ja'an-ro nuu-i xa n-kida-ia, ñatu ka juini-i xa kunini-i; unu lili-i. Xaxe'e xijan kuenda kuu xtuu nee xtuu du'a-i. ¹⁹ Xaxe'e xa ñatuka ka xini-i xa januu, mee ni kuechi ka kuu anu-i xa kada-i kida-i; ka kida-i xaloko nde ndaa n-xee. ²⁰ Maxku du'a ku kada koio-n chi ñadu xijan n-ka dakua'a ña'a ñayiu ka kakune'e Cristu. ²¹ ¿A ñatu n-ka kachitnu'u ña'a-i xa n-kida Jesús xi'in xa n-ja'an-ia u? ñn xa ndaa kuu xa n-ja'an-ia. ²² N-ka ja'an-i xa juini-ia xa dandoo koio-n mudu n-ka xo tuu-n. Diuni n-ka ja'an-i nuu-n xa maxku ku kuu koio-n ná n-ka xo kuu-n xi'in xa io xa dandoo koio-n xaloko xadu'a n-ka xo kida-n. N-ka xo xani ini-n xa ñn xava'a kuu xijan, te n-ka xo kuu anu-n xa kada-n xijan. ²³ N-ka ja'an ñayiu ijan nuu-n xa maxku kani ini ka-n xa kada-n xaloko. ²⁴ Diuni n-ka ja'an-i xa io xa tuku ñayiu nduu koio-n. N-kida lanyuux xa n-ka nduu-n ñayiu jandixa koio-ia te kada-n xa juini-ia xa kada-n nuda. Kada ndixa-n xa juini-ia.

²⁵ Xaxe'e xa n-ka nduu-n ñnka ñayiu, maxku ku ja'an vete koio ka-n. Ja'an ndaa koio nuu tna'a-n chi ñn ni ñayiu n-ka nduu-n. ²⁶ Nux kiti ini-n nuu ñayiu maxku ña'a kada-n-yi na kua'a maxku kada-n kuechi, xa maxku kiti ini koio-n nuu-i nyakanyaa ²⁷ na kua'a maxku ndaku Kui'na xa kada-n kuechi. ²⁸ Ñayiu n-ka kuu ñadu'u, maxku du'u koio ka-i. Na kadatniu koio-i xa na ni'i koio-i xa ka ndoñu'u-i xi'in xa na ni'i-i xa juña'a nga-i

ñayiu ka kunda'u. ²⁹ Maxku ku ja'an koio-n tnu'u loko tnu'u du'a. Ja'an koio-n nuu ñayiu xa n-ja'an Cristu xi'in xa n-kida-ia na kua'a va'a ka na jini-i xa'a. ³⁰ Maxku ña'a kada-n-yi na kua'a maxku kuko'yo ini Espíritu Ianyuux. Kuenda kiu sellu xne'e-n kuu-ia xa n-keé-ia anu-n, xa kuna'a koio-n xa dananita'u ña'a Ianyuux na xee kiu. ³¹ Taxkanu ini-n ñayiu kida u'u ña'a. Maxku kiti ini nuu tna'a ka-n. Maxku ndunde'e ka-n nuu ñayiu. Ni maxku kanandodo tna'a ka-n. Ni maxku kui'a ja'an ka-n ñayiu. Maxku jan kui'a tna'a-n. Maxku ña'a kada koio ka-n ñayiu. ³² Kada-n xa na kuu ñayiu xava'a. Kunda'u ini nuu tna'a-n. Taxkanu ini nuu tna'a-n na n-taxkanu ini ña'a Ianyuux xaxe'e xa n-xi'í Jesús.

5

¹ Xijan kuu xa kada koio-n xava'a ná kida Taa-ro Ianyuux chi n-nduda'ya ña'a-ia, te xemani ña'a-ia. ² Xaxe'e xa xemani ña'a Cristu n-doko-ia mee-ia nuu Ianyuux. N-kuu-ia ná kuu ñn xa vili xe'en n-ka xo doko ñayiu Israel nuu altar Ianyuux. Mudu ya'a n-chiya'u-ia kuechi-ro. Kada-n ná n-kida Cristu. Juemani-n ñayiu, te kada koio-n xa na kuu-i xava'a. ³ Maxku kava ñn solteru xi'in ñn soltera chi ta tnunda'a ka-i. Maxku kada-n kuechi xi'in ñayiu ñatu n-tnunda'a xi'in-n; maxku ku kuu anu-n xa daa kada-n. Diuni maxku ku kuu koio-n ñayiu kajan ini. Maxku kada koio-n xijan chi ñatu natau chi n-kida Ianyuux xa n-ka nduu-ro ñayiu ii. ⁴ Maxku ku jan ne ku jan yichi-n chi januu. Maxku ku jan loko ku jan du'a-n; ja'an nxa'nu koio-n. Maxku ku kine tnu'u-n ñn ñadi'i janda kaa-ña. Ni ñnka tnu'u loko maxku ja'an-n. Va'a

ka na ja'an koio-n nuu ñayiu: “Na kuta'u-da nuu Ianyuux.” ⁵ Solteru xkaa xi'in titni soltera a soltera xkaa xi'in titni solteru, xá ka xini-n xa ma ni'i-i ta'u-i nuu taxnuni Cristu xi'in Ianyuux nux daa ka xko kida-i. Ni ñayiu kida xane xayichi ma ji'in nuu taxnuni-ia. Ni ñayiu yo ka kukajan ini xa xneva'a inka ñayiu, mayo-i ni'i-i ta'u-i tuku. Kuenda kiu xndeñu'u-i ñin xa xndeñu'u-i xa ka kukajan ini-i xa xneva'a inka ñayiu.

⁶ Maxku juejoon-n xa danda'u ña'a ñayiu ka ja'an tnu'u loko tnu'u du'a. Xaxe'e xa ka ja'an-i xijan, kiti ini Ianyuux nuu-i, te kada u'u-ia-i na xee kiu chi ka kuxe ini-i nuu-ia. ⁷ Maxku kandeka tna'a ka-n xi'in ñayiu ijan, ni maxku kada-n ná ka kida-i. ⁸ N-ka xo kuu-n ñayiu ñatu n-ka xini jundu kuu Ianyuux, ko vitna ka xini-n jundu kuu-ia. Kuenda kiu nuu kanda ka xikonuu-n vitna. Kuikonuu kuikondodo koio-n ná ka xikonuu ka xikondodo ñayiu xini jundu kuu Ianyuux. ⁹ Ñayiu ka xini jundu kuu Ianyuux ndixa, va'a-i, te jandixa-i-ia. Ka ja'an-i ñin xandaa. ¹⁰ Chinuu koio-n nuu nax juini-ia xa kada-ro, te jun ini koio-n xa daa kada-n. ¹¹ Maxku kandeka tna'a-n xi'in ñayiu ta jini ka jundu kuu Ianyuux, ni maxku kada-n xaloko ka kida-i. Naa xa kada-n ná ka kida-i, datuu koio-n nax ka kida-i. ¹² Ñin xa januu kuu xa kakune'e-ro xaloko ka kida-i nuu ñayo nde'a. ¹³ Ntdaa xaloko n-ka kida-i nuu ñayo xnde'a, datuu ñayiu ka xini jundu kuu Ianyuux nuu dava ka ñayiu. ¹⁴ Hora na datuu ñayiu xini jundu kuu Ianyuux xaloko n-ka kida-i, jini ntdaa ñayiu xa xaloko kuu xa n-ka kida ñayiu ijan. Du'a yodotnuni:

Maxku kidi ka-n, nujun ini koio.

Ndoto ndo'lo, ñayiu ka kuu kuenda kiu ndiyi.

Te datnuu daye'e Cristu nuu kutuu kunukoo-n.

¹⁵ Ta'u tniu-da nuu-n xa kani ini va'a koio-n janda kutuu-n ñuñayiu. Maxku ku kuu-n ná kuu ñayiu ña ka xini jundu kuu Ianyuux; kuikonuu kuikondodo-n ná ka xikonuu ka xikondodo ñayiu ka kukaxi ini. ¹⁶ Kundu ini koio-n kada-n tniu Ianyuux; maxku dakuita-n tiempo chi yo kue'e xaloko kuu ñuñayiu. ¹⁷ Maxku ku kuu koio-n ñayiu lilu. Jun ini koio-n xa jini-n nuu nax juini Ianyuux xa kada koio ñayiu. ¹⁸ Maxku ko'lo koio-n vinu xa nde xini-n chi dakuita ña'a-i. Naa xa ju'un ña'a ndidí ka xi'i-n, na ju'un ña'a Espiritu Ianyuux ¹⁹ na kua'a najani koio-n nuu ñayiu xa yodotnuni nuu libru Salmos. Diuni ja'an koio-n nuu-i nax kakune'e canción Ianyuux. Xi'in nde yiki nde tuchi-n nakuetu koio-n alabanza nuu-ia. Xi'in nde yiki nde tuchi-n kata koio-n nuu-ia, te diuni dakande koio-n. ²⁰ Ndikiu ndiñuu juña'a koio-n nuu Taa-ro Ianyuux: “N-kuta'u-da, Taa-ro”, xaxe'e xa va'a kida ña'a-ia. Xijan ta'u-ro nuu-ia chi nini-ia xa ja'an-ro xaxe'e xa n-xi'í Jesucristu, Ia kuu Xto'o-ro, xaxe'e-ro.

Janda io xa kutuu kunukoo ñayiu n-ka tnunda'a nukee nuve'e-i

²¹ Xaxe'e xa ndeka ña'a-ia nttaa-ro, io xa jueyu'u juendetu nuu tna'a-n. ²² Ñadi'i io yii, na jueyu'u juendetu-ña nuu-s. Na kada-ña kuenda xa nuu Cristu, Ia kuu Xto'o-ro, xeyu'u xendetu-ña; ñadu nuu yii-ña. ²³ Se io ñadi'i, io xa junuu-s ñadi'i-s ná ñunuu Cristu ñayiu ka kukanu ini ña'a. Mee-ia n-dakaku ña'a roo, ñayiu ka kuu kuenda kiu yiki kuñu-ia. Kuenda kiu diki nttaa-ro kuu-ia, te

kuenda kiu diki ñin ñadi'i kuu yii-ña. ²⁴ Ná ka xeyu'u ka xendetu-ro ntdaa-ro nuu Cristu, daa na jueyu'u juendetu ñadi'i nuu yii-ña ndikiu ndiñuu. ²⁵ Se xndaxio ñadi'i, na juemani koio-s-ña ná xemani ña'a Cristu mee-ro xa ka kuu-ro ñayiu ka kukanu ini-ia. N-doko-ia mee-ia na n-xi'i-ia xaxe'e-ro. ²⁶ N-doko-ia mee-ia xa kada-ia xa nduu koio-ro ñayiu ii xi'in xa ndundoo ndunini-ro. Diuni n-kida-ia xa ka'u koio-ro tnu'u-ia yodotnuni, te jandixa-ro-ia xa na kua'a ndundoo ndunini koio-ro. Kuenda kiu n-xichi ñi-ro xa ndundoo ndunini-ro. ²⁷ Hora na nadayujun nadataka ña'a Ianyuux nuu-ia jini-ia xa va'a roo, ñayiu ka kukanu ini-ia. Diuni jini-ia xa n-ka nduu-ro ñayiu ii, ñayiu ña tuu na kuechi ndido tau, te najuen tnu'u ña'a-ia. ²⁸ Io xa juemani se io ñadi'i ñadi'i-s ná xemani ña'a Cristu roo. Io xa juemani-s-ña ná xemani-s mee-s. Nux xemani ñin seyii ñadi'i-s, xemani-s mee-s. ²⁹ Ñayo ñayiu xini u'u mee-i, chi du'a ñunuu-i mee-i. Xaxi xi'i-i xa na koo va'a-i, te xni'no-i da'ma-i. Ná ñunuu-ro mee-ro daa ñunuu ña'a Cristu roo, ñayiu kukanu ini-ia ³⁰ chi kuenda kiu yiki kuñu-ia ka kuu-ro. ³¹ Du'a yodotnuni tnu'u Ianyuux: “Xaxe'e xijan dandoo seyii tadi'i-s te xeka tna'a-s xi'in ñadi'i-s xa na ku kuu-s nduu-s idii nga ñayiu.” ³² Ñayo-ro kutnuni ini nakuenda du'a kakune'e Ianyuux Cristu xi'in ñayiu kukanu ini-ia. ³³ Na juemani se io ñadi'i ñadi'i-s ná xemani-s mee-s. Te na koo mee-ña xañu'u nuu yii-ña.

6

Janda io xa kutuu kunukoo da'ya xi'in tadi'i-i

¹ Ndo'o, sekuechi xi'in dichi kuechi xi'in solteru kuechi, io xa jandixa koio-n tadi'i-n. Maxku kuxe ini-n nuu tadi'i-n chi ñatu natau chi ñayiu ka kukanu ini Cristu, Ia kuu Xto'o-ro, ka kuu-n. ñin xava'a kuu xijan. ²⁻³ Yodotnuni: “Koo koio-n xañu'u nuu tadi'i-n.” N-ja'an Ianyuux xa nux jandixa-ro ley ya'a, kue'e xa kine'e-ro. Xa'a kuu xijan: “Kani ji'in-ro ñuñayiu te kutuu vii kutuu va'a-ro.” Vuelta ya'a kuu vuelta ki'na nuu n-ja'an-ia xa nux jandixa-ro ley-ia, kue'e xa kine'e-ro. ⁴ Ndixi, ñayiu ka kuu taa, maxku dakiti ini-n da'ya-n. Najani-n nuu-i xa n-ja'an Ianyuux. Juña tnu'u-n-yi nuu nax ta'u tniu-ia xa kada-ro.

Janda io xa kutuu ñayiu ka kidatniu du'a nuu xto'o-i, te janda io xa kutuu se kuu xto'o-i

⁵ Ndixi, ñayiu ka kidatniu du'a nuu xto'o-n, koo-n xañu'u nuu-s. Koo ndaa koo kuiti anu-n hora kida-n tniu-s. Kada koio-n kuenda xa nuu Cristu xinokuechi-n, ñadu nuu xto'o-n. ⁶ Maxku hora ni nde'a ña'a xto'o-n nde'e ku kadatniu-n xa na tna ini ña'a-s. Io xa ku kundaa ku kuva'a anu-n hora ka kida-n tniu-s, chi xijan ndajan Ianyuux. Kuenda kiu nuu Cristu xinokuechi-n xa xinokuechi-n nuu xto'o-n. ⁷ Koo ini koo anu-n xa kada-n tniu xto'o-n. Kada-n kuenda xa nuu Cristu, Ia kuu Xto'o-ro, ka xinokuechi-n, ñadu nuu ñayiu. ⁸ Xá ka xini-n ntdaa-n xa nux ka kida-n xava'a, taxi Ianyuux ta'u-n; kuu-n ñayiu ka kidatniu du'a nuu xto'o-n a ka kuu-n ñayiu ña ka kidatniu du'a nuu xto'o-n.

⁹ Dani ndixi, se xndaxio ñayiu ka kidatniu du'a nuu-n, maxku ja'an-n nuu-i xa kada u'u-n-yi a xa jani-n-yi. Xa xna'a-n xa ñin ni Ia kuu xto'o ñayiu ka kidatniu du'a nuu xto'o-i io xi'in ñayiu ñayo na

xto'o io. Ña tuu nax vi'i-ia nuu ka kuu-ro ñayiu ka kidatniu du'a a ka kuu-ro se xndaxio ñayiu ka kidatniu du'a nuu-ro. Andiu kuu nuu tuu-ia.

Kuenda kiu soldado xetniu armadura ka kuu ñayiu ka kukanu ini Jesucristu

¹⁰ Xa'a nga na ja'an-da nuu-n. Na chindee ña'a Ianyuux xa dani na kukanu ini-n Cristu, te kundu-n xi'in-ia. Na kadatniu Ianyuux anu-n xa daa na kada-n. ¹¹ Va'a xa va'a kada tu'a koio-n mee-n xa na kua'a maxku daja'an ña'a Kui'na xa kada koio-n kuechi. Kada koio-n kuenda xa soldado ka kuu-n. Ndiu nuu ñin soldado vestidura-s, te ne'e-s armas xa jin jantna'a-s. ¹² Kuenda kiu jantna'a-ro xa nde'e ka ndukundee-ro xa maxku kada-ro kuechi hora ka daja'an ña'a xaloko xi'in tachi loko xi'in mee Kui'na taxnuni nuu ntdaa xa'a. Kuenda kiu ka jantna'a-ro, ko ñadu ñayiu ka jantna'a xi'in-ro chi xaloko. Ka xikonuu-i andiu xi'in ñuñayiu, te ka taxnuni-i nuu ñayiu loko xtuu ñuñayiu. Ñatu ka kida-ro kuechi hora daja'an ña'a Kui'na xa kada-ro nux xndedi ini-ro. ¹³ Xa na kua'a maxku ndaku xaloko xa kada koio-n kuechi, kada tu'a koio-n mee-n ná io tu'a ñin soldado jin jantna'a. Xa na kua'a maxku ndaku Kui'na xa daja'an ña'i-i xa kada-n kuechi, kuna'a va'a-n nax kuu xa n-ja'an Ianyuux xa io xa kada-n, te kukanu ini na'i-n-ia. Ma kaka yata-n nuu-ia nux daa na kada-n. ¹⁴ Kuenda kiu ñin soldado duku dujun ka'a cinturón nunu xa maxku kiu ña'a ñin xa ñani ña'a ku kuu koio-n xa ja'an-n nuu ñayiu xa n-ja'an Ianyuux. ñin xandaa kuu. Diuni kuenda kiu ñin soldado ndi'u pechu ñin xa nani coraza ka kuu-n xa jandixa-n Ianyuux. ¹⁵ Xa na kua'a ji'in ñin soldado

xa jantna'a-s io xa ndiu-s ndixa-s, te xa na kua'a ji'in-n xa juña tnu'u-n ñayiu nax io xa kada-i xa na kua'a na ku kundaa ku kuvatu anu-i, kada tu'a-n mee-n. ¹⁶ Xko xadi soldado escudo-s nuu-s, xiti-s xa nda'va-s nda'a kuxi koko ka daxee se jantna'a xi'in-s. Kuenda kiu kada-n ná kida soldado jan xa nda'va-s nda'a kuxi koko jan xa ma juejoon-n xa kadatniu Kui'na anu-n. Nux kukanu ini-n Cristu ma juejoon-n xa kadatniu-i anu-n. ¹⁷ Kuenda kiu ñin soldado n-kaku xa kuú-s xa n-ñani diki-s ñin xa n-ñani xaxe'e xa ñu'u-s lelu kaa ku kuu-n xa kaku koio-n nuu Kui'na, te nanita'u-n. Ná kada-ro kuenda xa soldado ne'e espada-s xa dada'an ni'no-s mee-s ku kuu-n xa dada'an ni'no-n mee-n nuu ñayiu hora ja'an-n tnu'u Ianyuux yodotnuni n-ja'an Espíritu-ia. ¹⁸ Naja'an koio-n Ianyuux hora na kada-n ntdaa xa ja'an-da ya. Ndikiu ndiñuu kajan ta'u koio-n nuu Ianyuux xaxe'e ntdaa ñayiu n-kida-ia xa nduu-i ñayiu ii. Chindee ña'a Espíritu-ia hora na kajan ta'u koio-n nuu-ia. Kadayika-n mee-n te jun ini-n xa daa kada koio-n.

¹⁹ Kajan ta'u koio-n nuu Ianyuux xaxe'e daña tuku. Kajan ta'u koio-n nuu-ia xa na ni'i-da tnu'u io xa ja'an-da nuu ñayiu. Diuni kajan ta'u koio-n xa na kuyi-da xa ja'an-da nuu ñayiu nax io xa kada-i xa nanita'u-i. Ñayo-ro n-xo xini janda nanita'u-ro, ko vitna ka xini-ro. ²⁰ Xaxe'e xa'a yindi'u daña se kuu nda'a xe'e Jesucristu. Kajan ta'u koio-n nuu Ianyuux xa maxku yu'u-da xa ja'an-da xa io xa ja'an-da.

*Ndajan tnu'u Spalu ñayiu ka kukanu ini Jesu-
cristu xndaxio Éfeso*

²¹ Tíquico kuu se kachitnu'u ña'a nuu janda tuu-da, te nax kida-da do ya'a kiu na naxee-s do dian. Ñani-ro kuu-s chi ka kukanu ini-ro xi'in-s Cristu, te mani ka juini-ro-s. Xinokuechi kutu-s nuu Ianyuux te ña dandoo-s tniu-ia.

²² Natunda'a-da-s juan naxee na kua'a na kachitnu'u ña'a-s nuu janda xtuu koio-da xi'in nax ka ya'a-da. Kutuu-n xi'in-s, te kuka'nu anu-n.

²³ Yo kuu anu-da xa kada Taa-ro Ianyuux xi'in Jesucristu, Ia kuu Xto'o-ro, xa na kutuu vii kutuu va'a koio-n xa ka kuu-n ñayiu ka kukanu ini-ia. Na kutuu mani koio-n. Diuni na kada-ia xa dani na kukanu ini-n-ia. ²⁴ Na chindee chituu ña'a Ianyuux ntdaa-n xa ka kuu-n ñayiu ka xemani Xto'o-ro Jesucristu. Diuni na kada-ia xa dani ku juemani-n Jesucristu.

Tnu'u va'a tnu'u Jesucristo
New Testament in Mixtec, Diuxi-tilantongo
(MX:xtd:Mixtec, Diuxi-tilantongo)

copyright © 2001 Wycliffe Bible Translators, Inc.

Language: Mixtec, Diuxi-tilantongo

Translation by: Wycliffe Bible Translators, Inc.

Mixteco, Diuxi y Tilantongo [xtd], Mexico

Copyright Information

© 2001, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Diuxi-tilantongo

© 2001, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

601f9a87-70f6-56f7-8175-fc2dac9c9f9a